

欽定剿平粵匪方略

欽定勦平粵匪方略卷九十七 甲寅年

六月十四日 辛巳 琦善奏言據水師總兵葉常春

等稟稱六月初二日黎明賊舟百餘連檣東下
經署副將張肇龍帶領快槳船迎擊沈燬賊船
十餘隻溺斃賊匪無數賊眾披靡各艇連環進
攻四時之久又沈燬賊船五十餘隻奪獲三十
九隻生擒賊匪十數名起獲大礮二十五尊遊

擊照信等分督兵勇馳赴江干助勦總兵李志和等分帶官兵齊至四源溝沙漫洲一帶堵禦望見賊船百餘銜尾而至經艇師截擊賊遂敗退艇師乘勢力追奪獲大小賊船七隻賊匪處水上岸復經兵勇四面斫殺殲斃黃紅巾賊各十餘名次日卯刻復有賊船百餘隻自金陵觀音門往儀徵沙漫洲經艇船攔擊四竄南岸賊

船最多擊燒殆盡其竄至北岸者亦經水師與
儀徵水勇擊沈多船並有竄至六合交界青山
江面者經知縣溫紹原派兵迎剿斃賊多名惟
鎮江與瓜州切近江心又有金山賊營對設大
礮聯成一氣聲息相通戰艦縱多亦難扼斷現
值江水漲發瓜州賊濠三道引江灌注倍常寬
深臣連督陸路官兵進攻東岸之賊一見官兵

卽閉壘施礮西岸之賊阻水爲固均不出戰稍
近賊濠礮子雨至現值狂風積潦未易得手惟
有設法繞越相機攻勦

琦善又奏言據拏獲之僞總制劉玉山供稱此
次金陵賊船共有一百十四隻賊匪共一千四
五百名有僞檢點曾姓等統率不知其名又供
賊渠楊秀青聞北路賊匪被圍欲派大股賊匪

前往接應僞丞相獻計以安徽道路紆遠浦口
有官兵阻攔不如從揚州清江北竄查浦口直
對金陵寬平無阻揚州近接清江係驛站大道
尤爲賊匪所注意臣視師邗江方愧瓜州未復
逋寇稽誅何敢稍有疏虞使賊得以竄越奏入

上命軍機大臣傳諭琦善曰揚州水軍溯流迎剿兩路
追截賊船不能下竄六合儀徵一帶官軍亦各有拏

斬軍聲大振卽可水陸夾擊杜絕接濟以孤瓜州賊
勢琦善因瓜州與鎮江密邇中有金山賊壘與爲犄
角恐官軍戰艦難於扼斷尙屬實情然水師旣能得
手亦須由陸路設法直抵瓜州土城方爲勝算若如
所奏情形仍以閉營阻水爲詞當此夏令盛行積潦
狂風江鄉常事豈能待水退泥乾方作破巢之舉著
卽迅速進剿克復瓜州勿再延緩逆首楊秀青因浦

口有兵阻攔安徽道路紆遠欲徑走揚州直奔清江
琦善果能迅克瓜州則該逆寒心褫魄必不敢覬覦
揚郡若但株守邗江不復再謀進取使賊衆輕視我
軍卽連鎮高唐一律肅清亦恐另圖滋擾琦善節制
水陸各軍何至瓜州一股束手若此舟師鎮將葉常
春等前已開復原官此次復能打仗出力著傳旨嘉
獎

上又命軍機大臣傳諭僧格林沁曰前據僧格林沁奏連日大雨進剿仍未得手當經諭令趕緊進攻數日以來未見續報逆匪旣分竄高唐則連鎮之賊其勢已孤該大臣於攻剿事宜何以尙無把握本日據琦善奏稱拏獲僞總制劉玉山供稱逆首楊秀青聞北路賊匪被圍欲派大股黨與從揚州清江北竄現在琦善大兵駐紮揚州自可隨時堵禦惟北匪一日不

除設南匪又從間道北竄其事更不可開總之連鎮
逆匪若能及早殄除不但該逆不敢窺伺河北大兵
且可乘勢南下皖楚之匪亦可次第掃除若以殘敗
餘匪牽掣大兵曠日持久深恐別滋他變該大臣亦
當籌慮及此著卽督飭進攻毋再遷延

上又命軍機大臣傳諭勝保曰據琦善奏稱拏獲僞總
制劉玉山供稱逆首楊秀青欲派大股賊匪由揚州

清江北竄應援琦善駐紮揚州自可隨時堵剿設或
大股復來剿洗更屬不易高唐逆匪不足千人該大
臣督兵攻剿日久無功恐南賊聞之有輕量我軍之
心勢必乘虛北竄更肆猖獗著勝保等督飭將弁迅
將高唐州城克復此股既平即可與僧格林沁合力
剿辦連鎮逆匪既可肅清畿輔兼可爲南下之舉

同日都察院左副都御史袁甲三奏言 臣查六

安係由皖入楚入豫捷徑自被賊古踞廬賊之
接濟恃此南賊之北竄亦恃此聞該州紳民有
集團攻城之說臣卽酌派將弁統兵前往會剿
乃官兵未到該署牧茅念劬已督率紳士義勇
攻復州城殺賊甚多該紳民同激義憤建此大
功實爲軍興以來第一快事現聞舒邑團練攻
城未克六安紳民卞如舒等復率領千餘人自

備糧餉往舒助攻該署州亦擬親督大隊前往
合肥紳民亦有集衆助勦廬賊之說應請

旨飭令福濟查明捐糧督勇實在出力者共有幾人優
敘官職復

特予

恩詔酌免糧賦二三年並酌廣學額數名斯

曠典同邀鼓舞尤廣至現任六安營參將慶齡守備王

連陞把總陳法魁聞於城陷後逃至山中該紳民糾約義旅患無統領該參將等伏而不出置若罔聞應請

旨交福濟查明分別治罪至賊陷舒城時聞六安有劣紳孔廣春等串通城關紳民豫輦財物迎賊該劣紳等家擁厚貲轉齎盜糧實屬法所難容應一併請

旨交福濟查明該劣紳等家產先行入官以備公用並
訊明餽賊後有無甘心從賊情事分別治罪其
前任六安州知州宋培之城陷時如何下落此
次克復後曾否見有蹤跡吏目梁繪事巡檢俞
元齡鍾恕有無逃避情事此次督勇攻勦共成
義舉是否功過足抵並請

飭令福濟查明具奏奏入

上命軍機大臣傳諭和春福濟曰據袁甲三奏此次六安州紳民攻復州城舒城團練攻城未克六安紳民卞如舒等復率領千人自備糧餉往舒助剿合肥紳民亦有糾衆助剿廬賊之說請卽立與恩施等語著和春福濟確切查明據實具奏其六安營參將慶齡守備王連陞把總陳法魁於城陷後逃至山中伏匿前六安州宋培之有無下落著一併查明分別懲處

六安劣紳孔廣春等豫輦財物齎送逆賊小民食毛踐土尙當義切同仇況身列搢紳乃敢迎賊送糧情同叛逆如果查明屬實著卽將家產查抄入官並查明有無甘心從逆情事分別治罪吏目梁繪事等有無逃避情事此次督勇攻勦著有微勞是否功過尙足相抵並著查明具奏

十五日
午 壬 僧格林沁西凌阿托明阿奏言自六

月以來陰雨決旬逆匪蠱聚高阜我兵紮營河
次地處低窪該逆死拒不出難保不另生詭謀
臣因咨山東撫臣派員將連鎮上游四女寺引
河挑濬以期宣洩一面沿濠修築套隄藉資浸
灌東光閭屬紳民甚形踴躍復札飭吳橋縣一
律舉行臣仍督飭各營兵丁幫同修築俟興築
稍有規模體察情形如可以水爲兵立即設法

浸灌仍當趕緊另籌攻剿之法斷不敢以開空
套隄爲詞意存耽延奏入

上諭曰以水爲圍專爲杜其逃竄不能制其死命現惟
利在速戰惟恐其不出何反使之不出耶徒勞無益
曷若趕緊進攻較有把握沿濠築隄朕謂適啟其詭
謀汝出師半載有餘未能殲茲小醜屢次請罪朕皆
寬宥若如是耽延畏葸軍法豈能倖逃懷之

十六日

癸未

台湧奏言據都司葛以敦面稟六月

初二日午刻賊由青山一帶分股撲至武昌城外之塘角洪山等處營盤兵勇敗潰營被焚燒青廖派官兵千餘名出城抵禦令該都司持令前往督催甫經接仗突見城中數處火起城上賊旗分布漢陽漢口賊船亦紛紛渡江圍撲官兵四面受敵勢不能支賊遂由大東門入城該

官兵等奔至平湖門外聞崇綸青麋及在城文武大小各員半已縋城得脫省城失守實緣城中奸匪內應所致伏思省城旣失賊勢愈形猖獗江北一帶本爲該匪分股牽掣臣所統官兵僅二千餘員名難以制勝仰懇

天恩加派得力統兵大員迅速督率北路步隊星馳來楚會合剿辦臣飛咨英桂楊需督兵嚴防豫遏

北竄之路臣咎有難辭應請

旨治罪其崇綸青麀及在城文武大小各員下落容俟
確查另行奏辦奏入

上命軍機大臣傳諭楊需曰台湧頓兵江北屢次諭令
進攻漢陽如果迅速前進卽未能直達武昌亦何至
省城倉卒失陷此時武昌之賊跨江分踞又有黃州
之賊爲之犄角其勢愈覺猖獗楊需現授巡撫武勝

關防守事宜已諭令英桂趕緊出省督辦所有河南防兵卽留該處交英桂擇要布置舒倫保先到之滿漢兵已由小河驛進抵楊店台湧所帶之兵加以舒倫保後起未到之兵數已不少卽著楊需全行統帶迅速進攻阜市盤踞之賊爲數無多佈克慎著卽隨該撫前往武昌其阜市一帶卽交桂明勦辦武昌在城兵勇原不下萬人如尙可收用亟應妥爲招集內

有魁玉所帶荊州駐防兵紮營洪山此次逆賊係由
洪山直入大東門該副都統作何下落台湧摺內亦
未敘及著與青磨等下落一併詳查具奏武昌爲省
垣重地固宜迅圖克復而漢陽賊黨亦須防其北竄
楊需攝任兼圻應如何設法兼顧相機進剿之處迅
速馳奏

上又命軍機大臣傳諭官文曰武昌旣失賊勢愈形猖

獮非厚集官兵難期收復前調四川松潘建昌兩鎮官兵先後抵荆已由官文飭由漢陽過江赴省著卽嚴飭雙保福忻統帶官兵星夜前進聽候楊需調撥此外有無可調將領並著官文酌量派往

上又命軍機大臣傳諭塔齊布曾國藩曰武昌一郡關係東南數省大局該逆遽於初二日擁船渡江分股攻撲省城竟致失守此時若不亟籌攻克必致日肆

臨張楊需在信陽一帶防堵豫楚要隘本日已諭令
迅卽起程南下將台湧所領各軍全數統帶速籌剿
辦目下皖省賊匪紛紛上竄楚南逆蹤全行下駛尤
非上下游會合夾擊不能圖功曾國藩添募兵勇修
造戰船六月初卽可集事塔齊布先已馳赴岳州著
卽督帶水陸各軍乘勢東趨或合力進攻或分投截
擊總須隨剿隨進直達武昌迅復堅城官文等派赴

下游助勦之四川官兵由襄河一路前往並著塔齊布曾國藩互爲知照以期聯絡聲勢一面隨時照會駱秉章在楚鄂交界處所妥籌防堵毋稍疏懈

上又命軍機大臣傳諭英桂曰武昌於六月初二日被賊攻陷已有旨授楊需爲湖北巡撫兼署湖廣總督楊需現在光山商城各縣堵剿賊匪接到此旨自應卽日起程赴楚惟前因麻城之賊已赴武昌該處邊

防稍鬆議將兵勇酌撤現在武昌已失賊勢大熾難保不復圖北竄是豫省南境萬分喫緊著英桂卽行出省馳赴信陽一帶往來調度其黃土平靖武勝各關布置是否嚴密光山商城等處應否添兵扼守均著統籌全局迅速由驛馳奏毋得株守一隅坐視貽誤

上諭內閣曰武昌待援孔亟節經諭令台湧進兵策應

乃遷延日久尙在德安茲據奏稱六月初二日賊由
青山一帶分撲塘角洪山等處營盤兵勇潰敗省城
遽爾失守覽奏曷勝憤懣台湧職任兼圻毫無布置
前次暫予革職尙望其自贖愆尤乃一味因循貽誤
大局實堪痛恨台湧著卽革職交楊需差遣委用並
著楊需馳驛速赴新任統帶各路官兵迅籌勦辦務
將省城趕緊克復以次掃除各屬賊匪毋令日久占

踞武昌城內文武各員下落卽著查明具奏

十七日

甲申

上命軍機大臣傳諭駱秉章曰武昌省垣失守賊匪跨
江拒守其勢益張昨已諭令塔齊布曾國藩速卽統
領全軍星馳進剿以期直達武昌克復城池諒必遵
旨迅速前進需用兵餉著卽飭委賢員妥籌應付台
湧業經革職已授楊霈爲湖北巡撫兼署湖廣總督

卽日由河南馳赴湖北統兵前進惟自北而南中隔漢陽江面尙須繞道方抵武昌不若湖南兵勇可以直達故此時湖南救援尤爲切近著該撫一面飛咨塔齊布曾國藩速帶兵船東下一面再行酌調官兵以資策應與楊需等兩路夾攻以期迅掃逆氛

二十日

丁亥

僧格林沁奏言

臣

統籌全局南匪不

靖須防其續向北竄儻有警報自當分兵截剿

然尙須添調勁旅以厚兵力擬請

飭調察哈爾馬隊二千名綏遠城馬隊一千名哲里木
盟昭烏達盟卓索圖盟馬隊各一千名均由本
盟備兵札薩克統帶配齊軍械在各本處聽候
調遣並請

飭下工部置備應用鍋帳其察哈爾捐輸駝馬一併就
近牧放備調似於軍務有裨至連鎮逆匪負固

死拒臣萬不得已空築重隄以水爲兵另籌攻
勦之法現在連夜修築月內可以竣工臣擬俟
工竣用水浸灌相機攻勦奏入

上諭曰巡防王大臣密議速奏該大臣所調之兵有不
敷再調者亦有難期得力者可斟酌妥籌

同日官文貴陞奏言臣等接據探報知武昌失
陷根本重地亟宜速籌攻勦惟荆屬雖就肅清

而沔陽天門以下尙未疏通省城旣失荆郡尤
須加意嚴防以杜上竄之路兵勇本屬無多防
剿轉須並重督臣台湧尙駐德安已飛咨會商
攻剿之策懇請

飭下四川督臣籌撥餉銀來楚以資接濟

官文貴陞又奏言臣等據總兵雙保稟稱該鎮
統帶漢屯官兵由了角驛前進行至潛江之廖

家橋遇賊二千餘衆蠶擁而來當卽列陣迎擊
自辰至申轟斃賊匪八百餘名生擒長髮賊七
十四名潛江縣城內賊匪奔出助戰又經我兵
截殺數百名賊衆不支棄城逃竄我兵列隊入
城收復搜捕餘匪臣等飭令迅由襄河進剿天
門沔陽漢陽而援武昌總兵福忻統帶川兵五
百名本爲後起正飭由荆起程探稱有大股賊

匪二萬餘人由岳州旁竄常德攻撲富城因思
大江以南本屬空虛如常德有警則荆江亟宜
嚴防隨飭福圻星速過江在公安澧州交界地
方擇要紮營相機防剿截賊北竄之路惟原帶
兵僅五百名恐形單薄守備鍾埏適由川帶來
練丁一千一百餘員名臣等已飛咨四川督臣
迅派大員來楚統帶如探南省軍務喫緊擬卽

派委福忻統帶前赴澧州常德應援至江陵監
利潛江三縣各鄉村向多土匪出沒與各處逃
竄之賊勾引滋擾並有賊匪由荊門沙洋地方
竄至後港等鄉肆行劫殺尤應掃除淨盡臣等
已添派佐領錫齡阿同至丫角驛分路攻剿江
陵漸可肅清臣等又分飭駐紮監利兵勇迅剿
下鄉匪衆進攻沔陽以絕根株奏入

上命軍機大臣傳諭官文曰武昌失陷湖南復有大股賊衆由岳州旁竄常德福圻已帶川兵渡江在公安澧州交界處所相機剿截而監利潛江一帶仍有土匪勾結滋擾沔陽亦尙未復是荆郡防守情形不可稍涉鬆懈惟武昌爲根本重地黃州漢陽仍有大股盤踞該逆跨江拒守愈肆猖獗此時自以迅攻武昌爲急所有雙保原帶之川兵旣由襄河一路前進仍

著該將軍飭令疾趨進剿卽將天門沔陽一帶道路設法疏通以期徑達漢陽爲迅速進攻之計惟兵力尙單所有紮營了角驛之佐領錫齡阿等所帶兵勇能否分派赴省並此外有無官兵可撥著官文等相機調度至防剿岳州竄匪亦關緊要四川練丁旣行抵宜昌卽毋庸令其折回正可擇要布置惟專待川省派員接管恐緩不濟急該將軍如有得力將領卽

著先行酌派督率前進中途如遇楊需即可歸該撫
統帶設或此次官兵可先抵武昌亦不必因楊需未
到逗留守候

上

又命軍機大臣傳諭裕瑞曰武昌省城失守官文等
亟籌派兵隨剿隨進以圖攻復而湖南岳州又有大
股賊匪旁竄常德攻撲府城荆江一水可通已派兵
赴公安澧州地方防剿需餉孔殷裕瑞前經動撥津

貼項下銀三萬兩解往楚省現在道路梗阻著飭知
委員徑解荊州交官文截收設法轉運免致疏失並
著裕瑞於川省藩道各庫項下無論何款迅速籌撥
銀數萬兩趕緊續派委員卽日起程解交官文軍營
以應急需此外如有可籌之款仍著源源接濟其練
丁一千一百餘名據官文奏已抵宜昌該將軍因兵
力不敷已飛咨該督另派大員赴楚統帶卽著照議

辦理毋庸拘泥前次諭旨再令折回川省

二十一日戊子巡防王大臣奏言臣等遵查僧格

林沁請調察哈爾等處官兵擬將載齡所帶駐紮固安防兵一千名全數撥赴該大臣軍營令載齡前往雄縣統轄該處防兵以爲後路聲援再擬揀挑

圓明園八旗官兵一千名配齊軍裝器械卽日前

往大營合力攻勦並請

特派大員管帶協勦至該大臣請調察哈爾綏遠城及
哲里木等三盟馬隊官兵擬行知理藩院等衙
門轉行各該處照所調數目挑選齊備聽候調
用奏入

上命軍機大臣傳諭載齡曰現在連鎮攻勦喫緊亟需
添派官兵迅將此股殘寇殲除本日已派玉明帶領

圓明園八旗兵丁一千名前往連鎮軍營著載齡卽飭所帶固安防兵一千名一併前赴均歸玉明統帶所有雄縣防兵著載齡迅速馳往統帶以爲後路聲援一切防守情形隨時由驛馳奏

二十二日己丑琦善奏言賊船橫行江面艇船扼

定上游雖未能斷瓜鎮之對渡實已截金陵之下駛連日拏獲奸細供稱金陵與瓜鎮水路業

已隔絕往來逆首楊秀青已將湖南北等處賊船調回共攻艇師冀得打通江路再撲揚州糾合大股以窺清江又探賊於上游當塗江面以舟載荻謀用火攻經向榮飭令嚴防並據水師及儀徵帶兵官稟稱賊於金陵城外趕造火攻船隻多紮巨筏上安攬牌各等情是該逆密圖出擾兇燄方張艇師各船爲數無多急盼粵中

施風紅軍各船前來會剿據副將張華龍稟稱
六月初六日廣東遊擊吳全美等管帶紅軍船
五十隻全抵吳淞江口風聞上海有截留之意
臣思賊勢臨張艇師縱能力戰向前無如孤軍
莫繼惟有懇

恩飭下怡良等速催紅軍船全數駛入長江與艇師會
剿以維大局奏入

上命軍機大臣傳諭琦善向榮曰艇師扼守上游金陵
與瓜鎮水路業經隔絕吳全美等管帶紅單船五十
隻全抵吳淞江口此項船隻駛赴上游扼要分布則
水上一軍聲威已壯卽可爲肅清江面之舉著琦善
向榮飛催迎提督飭統帶水師各員與艇船合力攻
剿逆首楊秀青將湖南北賊船調回共攻艇師冀得
打通江路自係意中之事惟在該大臣等妥速調撥

乘賊船未集之時一鼓作氣庶可大挫賊鋒該逆於
當塗江面以舟載荻又於金陵城外趕造火攻船隻
詭計百出必須先事豫防著向榮於當塗一帶設法
破其奸謀並嚴飭葉常春吳全美等加意防範陳金
綬近日未見出仗獲勝能否得力著琦善據實具奏
上又命軍機大臣傳諭怡良吉爾杭阿曰廣東紅單船
全抵吳淞江口聞上海有截留之意此項船隻原爲

調赴金陵等處協同剿賊現在水路艇師疊獲勝仗
正可乘此聲威肅清江面聞該逆欲將楚省賊船調
回共攻艇師冀得打通江路再撲揚州情形甚爲喫
緊著怡良吉爾杭阿迅卽催令上駛毋得截留上海
並著將鉛子火藥等項卽於吳淞口備齊以便趕赴
焦山會合水師藉資攻剿

同日和春福濟奏言 臣等以廬州逆匪堅伏不

出隨將大礮運至城邊晝夜轟擊時聞鼎沸之聲頗覺驚惶亟應乘勢攻剿六月初一日傳令西北各營攜帶攻城器具四面合圍奮力急攻逆匪死力堅守以槍礮回拒並拋擲火毬火罐勢如驟雨北門得勝門各突出賊匪二三千人官軍奮勇爭先斃賊無數逆勢不支敗退入城復派兵勇於三更後潛至城下計圖暗襲該逆

已有準備初二三四等日派令各兵勇更番環擊賊匪一味死守未能攻入初五日天尙未曙復令兵勇分攻各門一面密飭音德布江忠濬等於得勝門一帶暗置雲梯如該逆出巢卽乘閒登城爲聲東擊西之舉該兵勇乘酣戰之際暗將雲梯三架立置城堞踴躍先登詎逆匪滾木擗石火罐火箭紛紛拋擲兵勇受傷未能得

手廬州各營僅止三五百斤之礮城大而堅難
資得力臣等已飛調揚州大營三千斤大礮三
尊安置礮臺晝夜轟擊以圖進取

和春福濟又奏言據忠泰咨稱該副都統督帶
兵勇進攻巢縣馳抵濠邊見西門城河賊船甚
多匪均藏匿屋內當令兵勇分途攻勦北門突
出賊千餘名遊擊伊林布督兵連開槍礮斃賊

數十名餘匪敗走將城外賊營平毀並燒燬賊
巢數處嗣東門又突出逆匪一股意在抄襲後
路佐領長壽等揮兵三面夾攻斃賊多名賊勢
敗潰閉門不出約斃賊匪二百餘名霍邱縣賊
匪經劉玉豹等督率兵團三面圍攻斃匪六七
百名仍飭趕緊設法進剿奏入

上命軍機大臣傳諭和春福濟曰廬州賊匪和春等連

日派兵攻襲未得登陴賊能守而我不能攻徒以堅
伏不出及早有準備爲詞於攻勦事宜毫無把握所
謂賊勢窮蹙者安在大敵現已解運到營卽當趕緊
轟擊一面別出奇兵立時攻克若專恃礮力僅於城
外遙聞驚惶鼎沸之聲是直以虛詞搪塞遷延貽誤
難逃朕鑒秦定三所帶官兵於初四日馳抵鄧鎮合
以紳團兵勇兵力已厚蕞爾舒城無難收復著卽飭

催進攻不得延緩其巢霍兩處賊匪雖疊有斬獲總
未能痛加勦洗逆匪占踞廬郡牽掣我軍而安慶舒
桐等處恣意蹂躪無所顧忌似此遷延何時始能蕨
事和春福濟統領全軍日久無功徒以空言入奏豈
能辭貽誤之罪耶

二十三日

庚寅

駱秉章奏言查華容界連湖北荆

州各屬時有土匪勾結長髮闖入邊境四月二

十八日突有大股賊匪分四路而至知縣宋昌
期督兵勇固守至五月初二日城被殲難當飭
都司烏什哈等帶兵五百名就近馳赴澧州一
帶進剿行抵龍陽探有賊船百數十隻由華容
一帶揚帆直抵西港勢將竄越該縣臣復調都
司李輔朝等各帶楚勇一千名統歸貴東道胡
林翼節制胡林翼自帶黔勇六百名前已委赴

安化縣搜拏會匪卽飭其取道益陽馳赴龍陽
常德一帶相機援勦正調撥間十二日賊匪攻
撲龍陽縣城城垣坍塌甚多逆匪由缺口擁入
縣城失守烏什哈等不知下落臣以龍陽距常
德水程僅一日常德雖有兵勇二千尙形單薄
咨商署提臣塔齊布派委遊擊周鳳山帶勇一
千餘名由益陽前進但賊船乘風飛駛程途迅

速曾國藩所有師船正在趕緊修舵尙難剋期
戴事廣西委員李孟羣所募水勇千名尙無抵
省確耗焦急不可名言惟有嚴催各路將領遄
督兵勇迅速殲除以冀稍慰

宸廑奏八

上諭曰失守城池暨殉難之文武各員著查明分別請
卹嚴叅烏什哈雖非守土城陷猶存豈能任其趨避

亦卽行嚴柅

二十四日辛卯僧格林沁奏言臣挑挖重隄冀得

藉水浸灌不料連日大雨河水陡長連鎮南面
河隄被水衝決水勢甚猛四女寺引河德州已
報開挖現在決口之水已將賊匪占踞之陳莊
及南面小村浸沒數尺逆匪或在牆垣房上躲
避或梟水奔赴連鎮惟套隄興工未及一半河

隄衝決東面營盤不能屯紮現在調取船隻暫紮水營臣已派員前往德州提牘洩水俟水勢漸消卽趕緊搶護河隄一面相機攻擊奏入

上命軍機大臣傳諭僧格林沁曰前據僧格林沁奏挑挖重隄爲截水灌賊之計朕早知其徒勞無益當經嚴切批示諭令趕緊進攻嗣據僧格林沁奏報並未陳明進攻之策但稱隄工已有就緒是直視挖隄一

節爲可恃以成功而置萬餘重兵於無用之地現在
南面河隄被水衝決雖賊踞村莊閒有浸沒而我兵
東面營盤竟至不能屯紮可見築隄截水不但未能
制賊而衝決浸灌我兵轉受其害更恐該逆乘機紛
竄泥淖之中我兵馬隊不能得力僧格林沁以此等
迂緩之謀視爲上策朕實不解逆匪竄踞連鎮數月
之久未受懲創反得養其精銳蓄其奸謀而我兵力

疲氣餒何日始能蕺事著卽懷遵前次諭旨以速戰制賊之命不得仍恃水圍徒延時日

同日陳啟邁奏言自克復建昌後探聞大股逆匪由九江齊赴德安卽飭遊擊富克金泰等統帶兵勇二千餘名馳赴德安行抵距城十餘里之拖溝嶺地方該逆二千餘人突出衝撲我兵堅陣迎敵斃賊無算已革知縣劉希洛亦督帶

團勇隨營自效章武軍練勇首先登梯各兵勇
攀援直上衝煙冒火飛躍登陴賊匪見而驚潰
由北門竄出我兵乘勢掩殺當卽收復縣城搜
剿逆匪二百餘名餘匪悉竄湖北興國州臣現
委臬司惲光宸督兵扼守要隘相機剿辦奏入
上諭曰尤應不分畛域越境剿洗不准祇顧本境暫圖
目前靖謐致貽後患於無窮也

二十七日

甲午

英桂奏言查楚北漢黃德各郡徧

地賊蹤皆與汝光一帶毗連今武昌又爲賊踞
逆燄愈張難保不復圖北竄現將商光原派駐
守兵勇仍循其舊激勵鄉團以助兵力其續調
援勦兵勇酌量移往信陽武勝黃土平靖等關
分駐兵勇共一千餘名連楊需所帶不過二千
餘名尙形單薄擬將應援之兵擇要分布與前

駐關兵勇相距或十餘里或數里不等要使聲
息相通防範周密南陽所屬緊與襄陽樊城接
壤襄樊爲川陝通衢久爲逆匪窺伺若得重兵
扼守不但南陽無憂尤可遏其竄入川陝之路
可否仰懇

天恩飭下川陝督撫酌移防邊官兵扼守襄陽至東路
歸陳一帶防堵仍未敢稍懈臣於拜摺後卽行

馳赴信陽先於三關加意布置嚴防逆匪北竄
仍當懷遵

聖訓往來調度不敢株守一隅奏入

上命軍機大臣傳諭英桂曰湖北與河南接壤豫省防
剿事宜英桂責無旁貸據稱馳赴信陽先於三關加
意布置卽著迅速起程俟抵該處後查看情形何路
緊要卽親往何路督辦

上又命軍機大臣傳諭裕瑞曰賊匪占踞武昌難保不更圖旁竄雖宜昌已經收復而川楚交界地方尤應加意嚴防該督前派巴東利川兩處接防官兵是否可以量移前進應行駐紮何處並此外有無可調之兵著裕瑞酌度辦理

上又命軍機大臣傳諭王慶雲曰武昌失守楊需由豫赴楚英桂亦出省往信陽等處堵賊北竄襄樊一帶

爲陝省咽喉著王慶雲酌量情形移調兵勇前往扼
截勿得但顧陝境其與河南毗連各隘口仍著照舊
設立營卡巡防或卽飭糧道陳景亮等督率縣營認
眞辦理

二十八日乙未勝保德勒克色楞善祿崇恩奏言

臣等置備攻城器具欲卽督兵進攻而連日大
雨平地水深數尺以致環城大道積水甚深萬

難進攻該逆知我兵不能前進思乘隙免脫城
中米糧將盡其心愈急拚死相爭臣所統官兵
僅有數千進戰有餘圍剿不足該逆每乘夜四
出撲擾藏身泥水之中各持刀矛伏行暗入我
隊官兵奮力進戰並不退卻以致傷亡不少甚
覺可惜現在盡力籌辦一俟天氣晴明卽當合
力齊舉克復州城稍紓

宸廑奏入

上命軍機大臣傳諭勝保德勒克色楞善祿崇恩曰高唐逆匪占踞已久連日陰雨逆匪雖未竄出而我兵多有傷亡於攻克城池仍係毫無把握益增焦灼環城積水甚深進戰固難得手當賊匪夜間撲擾之時儘可設法殲除此股逆匪數不滿千困守孤城無從裹脅但能隨時斬戮自可日亡日少何至任此數百

殘寇久踞城池所稱城中糧草殆盡之語未甚確實
無論賊勢窮蹙與否總以剋日攻城殄滅淨盡爲上
策不能專恃勇力之處卽應設謀用計妥速籌攻豈
可坐待天晴始圖進取昨據僧格林沁奏挑挖重隄
因運河陡漲致有衝決儻連鎮逆匪乘我兵泥淖難
追併力南竄勢必勾連復熾剿辦愈難諒該大臣等
統籌全局必不敢有意耽延也